

Guangjisi Minzcu Bau

ganhhau: CN45-0036 B.2018 Nd.1 Ng.31 liggaueq dingyoux nienz ndwenlab cibhaj

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3310期

Ginhsiu Minzcunghgiz Guh Ndei Hong Cuengq- ingj Caeuq Hoizguh Denyingj Vah Minzcuz

金秀民宗局做好民语电影播放和译制工作

Ginhsiu Yauzcuz Swciyen Minzcunghgiz lienzhab Ginhsiu Denyingj Gunghswh youq ndwen 1 ngoenz 23 banringzgvaq daengz Dacangh Yangh Vajcangj Cunhvej aen yienh neix haiguh soengq denyingj Vahyauz roengz mbanj hozdung, ngoenzhaenx banhaemh youq Vajcangj Cunhvej Mbanj-cunghhoz cuengqingj le ciengz 《Yaengx Fwngz Hwnjdaeu》 denyingj boiqyaem Vahyauz he, vunzlai aen mbanj neix caeuq vunzlai mbanj

henzgyawj cungj ganj daeuj yawj. Ciuq cam rox, ciuq mizgven vwnzgen cingsaenz, giethab gij saedsaeh aen yienh neix caeuq gij iugouz vunzlai daezok haenx, daj bi 2016 doxdaeuj, minzcunghgiz aen yienh neix lienzhab Ginhsiu Denyingj Gunghswh gonqlaeng bae daengz gak aenmbanj minzcuz vunznoix cuengqingj denyingj boiqyaem vah minzcuz daengz 120 ciengzbaez, bouxyawj daengz 16700 lai boux.

Seizneix, Ginhsiu Minzcunghgiz caeuq Ginhsiu Denyingj Gunghswh cingq lienzhab loegguh 《Goengriu Saenq Vujlinz》 denyingj boiqyaem Vahyauz (Vahbanzyauz), ceng' aeu youq bineix ndwen 9 daej ndaej cingqciengz cuengqingj, hawj vunz-lai Yauzcuz ndaej yawj daengz bouh denyingj heiq ndeiri doxhoenx neix, dawz gij gvansim dangj doiq vunzlai minzcuz vunznoix, soengq daengz ndaw vunzlai Yauzcuz bae.

(Vangz Siubingz)

SIUSIK DINJ

简讯

● Ndwen 1 ngoenz 21, aen lienzhabhoih hangz yisuz vwnzva Lungzlinz Gak Cuz Swciyen cujiz gak vwnzva yisuz donzdij daengz Nganzcaz Yangh Gajbwz Cunh haiguh coux ciengmoq vwnzva leih beksingq hozdung, vih vunzlai dangdieg soengq bae doiqcieng, soengq saw, soengq gij yaemsiengq gvanghdez daengj, gangj gij cingsaenz Cibgouj Daih, caemh-caiq haiguh vwnzyi yienjok, angq-coux ciengmoq.

(Linz Binh)

● Ndwen 1 ngoenz 27, aen hainduj yizi Guengsae Vwnzlenz bi 2018 ciengmoq vwnzyi leih beksingq hozdung “aen loqsiengj Cungguk raeuz—vwnzyi haeuj fanh ranz” youz Guengsae Vwnzlenz, Namzningz Siveij Senhconzbu, Namzningz Si Vwnzlenz lienzhab cawjbanh, Cinghsiu Gihvej Senhconzbu, Cinghsiu Gih Vwnzlenz bangbanh haenx youq Namzningz Si Ginhhu Gvangcangz hainduj. Langhbaej gij cingzcik Guengsae, Namzningz geij bi neix daeuj vwnzyi hwngfat doengzseiz, hix vih Namzningz siminz soengq daeuj donq vwnzva ngaizhoengh he.

(Nungz Veiyngi)

● Ndwen 1 ngoenz 22 banhaemh, Dwzbauj Yen Gaiq Daihroek Heiquengh Baihnamz Comzyienj youz Dwzbauj Yenvej, Yen Yinzminz Cwngfuj cawjbanh haenx youq minzcuz vwnzva cungsim gvangcangz aen yienh neix haimuq, 《Gij Gvansim Suhgi》 youz Aen Duenz Heiquengh Yezyiz Gizveih Cwngzgvanh Cin yienjok haenx hainduj le baez comzyienj neix, baenz fanh boux bouxyaez Heiquengh daengz dieg yawj.

(Nungz Yungifang)

● Ndwen 1 ngoenz 26, Liujcough Siveij Senhconzbu, Liujcough Si Vwnzlenz cujiz aen faendoih iq vwnzyi bae daengz Sanhgyangh Duncuz Swciyen Danhcough Cin Danhcough Cunh haiguh gangjlwnh gij cingsaenz Cibgouj Daih “haeujlaeg saedceij·cap rag beksingq” cawjdaez saedguh nem vwnzva bangfuz hozdung, doenggvaq gofoux, siujbinj caeuq yienhciengz raiz doiqcieng daengj lai cungj cezmuq, caeuq vunzlai dangdieg guh lienzvuen, rengzrdw gikfat gij saenqsim caeuq gikcingz vut gungz beksingq Mbanjdung.

(Bangz Gwzbingz)

Yungzsuij: 2093 Ranz Ranzgungzhoj Angq Senj Haeuj Ranzyouqonj Guekgya



融水:2093个贫困户 喜迁国家安居房

Ndwen 1 ngoenz 26, Yungzsuij Myauzcuz Swciyen cujiz ganbu dangdieg bang 22 ranz ranzgungzhoj Duncuz mbanjbya Swyungz Yangh Yungzdi Cunh buen senj daengz ranz-anceiq bangfuz senj dieg, hainduj saedceij moq. Ciuq gyoepsueng, seizneix, Yungzsuij gaenq miz 2093 ranz vunzlai gungzhoj gak cuz buen haeuj ranz-anceiq bangfuz senj dieg guekgya daezhawj haenx youq. Ndaw doz dwg beixnuengx Duncuz rap doxgaiq haeuj ranzmoq.

(Gungh Siengzyouj/龚祥友)

Denzlinz Gvangjbo Iq Lajmbanj Senhconz “Sing'yaem Ndei”

田林农村小广播宣传“好声音”

“Gyoengq beixnuengx, caezgya ndei, seizneix dwg seiz gangj gij cingsaenz Cibgouj Daih dangj. Gij baugau Cibgouj Daih dangj daezok, baujmaenh gij gvanhaeh bauguh reihnaz onjdingh caemhcaiq ciengz-geiz mbouj bienq, lwnz daihngaih bauguh reihnaz daengz geiz le caiq gyalai samcib bi……” Mboengqneix, Denzlinz Yen gak hingzcwngcunh doenggvaq “gvangjbo iq” gyoebcomz gangj gij baugau Cibgouj Daih dangj, ndaej daengz gyoengq vunzmbanj

angqcoux.

Vih caenh' itbough doicaenh gij cingsaenz Cibgouj Daih haeuj lajmbanj, aen yienh neix gibseiz haidoengh aen gunghcwngz gangjlwnh “gvangjbo iq” lajmbanj, hawj “gvangjbo iq” baenz “cwngzyenz moq” gangjlwnh gij cingsaenz Cibgouj Daih. Youq 14 aen yanghcin 166 aen hingzcwngcunh aen yienh neix, ngoenznaengz cungj youz 166 boux cunh dangjcihsuh roxnaeuz cunhvejveij cujyin, faenbied yungh

Vahcuengh, Vahyauz daengj vah-deihfueng dingheiz gangjlwnh caeuq gejdoug gij cingsaenz Cibgouj Daih. Gak cunh leihyung “gvangjbo iq” cunhvejveij genhciz youq dingh seiz guh boquengq, yungh vah doengsug gangjlwnh. Doenggvaq cungj hingzsik neix, dwkdoeng le gangjlwnh “goengleix gatsat”, damqra ok diuz vunqsim gangjlwnh haeuj gyawj vunzlai, cienzmienh cwgoemq, ndaej angqcoux he.

(Yenj Cinbyauh)